

西泠僊詠



道光丁亥秋鐫



西湖懷仙閣藏板

西湖懷仙閣藏板



以守道謂速依二字行持利人濟物足以補救將來此外不必多求也通元爲妙香分支妙香者飛祖顯化之地飛祖者麻姑也潔誠往謁蒙示偈云川嶽靈鍾江淮秀毓道脈淵源金門草色金門草色隱碧城二字余舊號也同人謂余當受道脈之寄因益自勉然苦未得口訣歸吳門遇同族女弟蘭雲金蓋閔師弟子也曾靜坐四十七日而開元關傳西竺心宗憫余衰朽傳余以內視胎息之法行之有效先是嘉慶戊寅余在吳門患病甚劇閔師爲誦大洞玉章經而愈因執弟子禮而未遑問道也至是師自山中來余晉謁葆元堂師與談陰陽雙修之理余自維聞道苦晚未能出色界天恐道力不足以勝也願聞清淨之法師

西泠仙詠自敘

二

乃示以性命雙修仙家之正宗佛家之上乘仙佛合宗之秘旨亦卽儒家之心傳三教同源至是始得一貫越二年辛卯自楚旋邗重至通元濟祖示以人元之法命宗之捷徑陰陽雙修之密諦也次室管守性先余學佛十年曾注心經淺說深悟色空之旨學佛之後繼以學仙由性學而通命學頗有所得就駐鶴壇叩之沈祖太虛示云修道貴在人元乃人之本來元炁非藉乎外求也心正意誠頭頭是道守道靈根夙慧惜乎外眩而不內求守性夙具道根能窺上乘亦不昧靈根慧心所致耳余至是乃專心清淨是歲九月望道姥臨雲淨壇傳余頂珠普吉真言並云有弟子摩鉢尊者爲汝持家可無內顧謂守性也先是余官

雲間郡人於香壇問余前生云爲玉局修書使者前年陳師樵雲臨駐鶴云守性與余前生同爲玉局校籍之人今又得道姥所示知夙慧遠勝於余不但以伉儷目之因易兄弟稱若無著天親也余與守性旣同志學道益求道書讀之道言所遺廣成最古其語黃帝曰至道之精杳杳冥冥至道之極昏昏默默無視無聽抱神以靜玉皇心印經亦云上藥三品神與氣精恍恍惚惚杳杳冥冥存無守有頃刻而成回風混合百日功靈天人合一之旨也太上清淨經云人神好清而心擾之心好靜而慾牽之常遣其慾而心自靜澄其心而神自清日用經云一念不起謂之清靈臺無物謂之淨道德經云視之不見名曰夷聽之不聞

西泠仙詠自敘

三

名曰希搏之不得名曰微致虛極守靜篤萬物並作吾以觀其復黃庭經云虛無自然道之固子能守一萬事畢獨食太和陰陽氣清淨無爲神畱止廣成子與太上一人故語道相合自金碧龍虎靈寶畢法先後繼出而命學始顯叅同悟真作而鉛汞嬰姪其名益多然盜天地竊陰陽非性功不能得也卦爻火候斤兩非性功不能守也唱道真言以煉心爲仙家徹始徹終之要道金華宗旨以回光爲煉魂制魄保神斷識之妙諦皆言性也與大學之格致誠正中庸之中和位育論語之克己復禮孟子之勿忘勿助語皆相合與如來十二部經轉識爲智亦無不合蓋言性則三教同源爲上品第言命則尙中品下品也陳翠虛語

白玉蟾以身鉛心汞定水慧火爲上品煉丹天仙之法簡  
易易成卽此義也佛家以圓覺經爲頓教上乘六祖慧能  
以頓悟得受衣鉢閱師天仙心傳亦以萬緣放下一語爲  
宗旨李泥丸真人以傳沈祖太虛也數年以來余於諸經  
頗叅究其義然致知多而力行少故家益累境益困道益  
不進又作爲語言文字輒以道自許洪濟真人誨余曰凡  
事起於因緣而終以果報前定者因也現在事果也和氣  
致祥和者炁也欲求其和則在中庸中道而已和炁卽天  
地之炁卽道炁卽太極之真二五之精中者心之正也中  
和則天地位萬物育矣况一家乎修道要在萬難辛苦中  
打出毋自暴自棄也蓋恐余因境墮道也海真官誨余曰

西泠仙詠自敘

四

欲挽天運先挽人心欲化人心先化自心自心尙不能化  
徒言挽斡天地之心寄於人人心正天心亦正人氣和天  
氣亦和故致中和天地位萬物育諸子且將自心刻刻省  
時時察人人和事事實不管別人知我罪我維搜已過莫  
管他非人人如是則世界成爲上古不難矣守道庸庸一  
生雖文章美冠天下閻羅老子不因美文章而用情也皈  
道而不眞誠已入寒冰之獄况沽道之名而未有一毫之  
實恐入阿鼻而不赦語語警切深中余病蓋恐余以道自  
滿也因竭誠悔罪具疏以自懺焉閱師受西竺心宗及大  
梵斗咒於雞足山黃祖守中於釋迦如來爲一百二世受  
道法於高祖東籬於邱祖長春龍門派爲十一世余皈閱

師爲第十二世世傳西游記爲邱祖所作藉言丹法攷邱祖西游記祇二卷載在道藏所記自東至西程途日月及與元太祖問答之語其要言并未及載觀邱祖本傳則亦僅勸止殺節慾數語而已世傳西游記則邱祖門下史真人弟子所爲所言多與性命圭旨相合或卽作圭旨之史真人弟子從而演其說也閔師嘗言黃祖守中元末至中國居雞足山名野闍婆闍順治中入京師禮王崑陽律師求受三大戒崑陽辭以百三十年後當有人送至崑陽龍門第七世也閔師乾隆中官雲南相距正百三十年嘗奉三大戒入滇訪黃祖於雞足龍躡山房以易梵音斗咒西竺心宗黃祖始證果而去三大戒謂初真中極天仙也余

西冷仙詠自敘

五

叩閔師辭以未錄副本心恒悵悵上年癸巳同門趙君刻碧苑壇經於吳門蓋崑陽於秣陵碧苑開壇說法之語所言切近明顯徹上徹下所以鞭策性功者甚至不言戒目而戒之大旨在其中始知道之有真而道門之不二也崑陽承邱祖之傳邱祖出呂祖之徒王祖重陽門下呂祖距太上四傳昔爲道宗今爲道祖嘉慶中

仁宗睿皇帝加燮元贊運四字於封號列諸祀典道脉相承淵源有自今而後益不敢妄自菲薄矣昔呂祖六十四歲遇正陽子鍾離先生白玉蟾六十四歲遇陳泥丸馬自然六十四歲遇劉海蟾劉朗然亦六十四歲遇師余今年六十四歲矣計自五十七歲聞道已閱八年障雖空而魔

未淨愛緣雖澈而一家之衆生待度方殷也既又自念下界螻蛄雲淨一壇方丈地耳始則道姥親臨示訓繼則雷祖命海真官臨壇所以垂慈接引者至深且厚自問何修得此及受道籙有神霄玉府兩宮校籙之銜神霄屬雷部玉府屬斗部故慈訓殷殷也去年春東游海上遇朱君野鶴年七十而有嬰兒之色閔師友也幼遇葛祖稚川爲治膈症並勸讀抱朴子學道垂三十年初脩命功同志四人其三人皆不成並膺異疾逝已亦患口腭之症遇僧圓通於淮陰示以性功疾乃愈而功亦漸進始知命功非性功不能守也道家之書煉精化氣煉氣化神煉神還虛煉虛合道精氣神命也還虛合道性也不善體會遂成兩事性

西泠仙詠自敘

六

未明而命先失矣先從煉虛合道入手是爲頓學性中有命一超直入本性既明再循序漸進以基命功性命雙修性全而命亦全是爲上乘朱君徧游名山叅方訪友所遇多善知識所得如此喜余所見相合稱莫逆焉白虎首經至寶自來多以處女梅子首經當之朱君云白虎喻腎也經卽金也坎中一畫眞陽也取坎中之眞陽填離中之眞陰故曰至寶龍女獻珠成佛自來以爲雙修之證朱君曰龍陽物也龍女則陽中之陰也寶珠龍女精氣神所結而成卽性命也見佛而獻寶珠喻盡性至命而見佛卽煉虛合道也轉男身而成佛則陰淨陽純矣或問抱朴眞誥多言丹法似求仙者必當煉丹余謂此秦漢方士相沿之舊



說也卽有之亦不可服無金石之腑臟而服金石之藥餌何以勝之草木之實僅可治疾及培補後天耳身外無丹法一言以蔽之矣或問古書多言房中之術始於黃帝及容城彭祖之倫似卽男女雙修之所祖此閨丹之說卽俗傳三峯採戰實與金石鑪鼎同爲旁門皆不可學雙修而體交者亦旁門也非體交而氣交其法較善氣交亦非大庭廣衆之事故曰房中玉女閉房亦此意也蓋天地之道陰陽而已男女則陰陽之至純者陽中有陰陰中有陽互返其宅兩國無傷其效亦甚速然非開元關不可元關開則天地之氣悉皆歸又無藉乎此矣昔黃帝受道法於廣成旣明語以毋勞爾形毋搖爾精神將守形乃可長生矣

西泠仙詠自敘

七

斷無御女採戰之事或卽靜中氣交之法貴爲天子後宮繁多以千二百女供其氣交又得素女授以口訣則其得益較之常人自倍長生久視或由於此男女大欲所存相近無不感者相近相感而始防危慮險其所失也大矣又不若專言清淨卽一身之陰陽煉已待時日進而有功也鍾呂傳道錄諸書多言內丹外丹其實內丹外丹皆就自己一身言之非有他也呂祖恒自稱回道人說者謂意取兩口卽呂字隱語似矣不知以小口藏大口中兼有收視返聽之意故金華宗旨以回光爲金丹秘訣也三寶心燈稱回春子虬在灣石壁詩稱回回翁回心子皆是道家言呂祖前世爲上古皇覃氏距唐不知幾千百年中間豈無



如學道悟一分道是一分福恒閉關禮誦嘗誦玉章經十萬八千卷誠感洪濟真人臨壇示訓也雲姬年幼恒慮余學道有開閣之舉謂余曰女子以名節爲重生是夢死是覺吾心已覺君勿疑也誦大悲咒彌陀經上口輒成誦大巫李媪言其前生爲虎邱山寺花神今生現優婆夷身也未受錄而向道者二人次女麗姬通元命名芝石樵雲師給名心恒記名心院玉冊今皈依蘭雲名來依字曰馥雲叔姬文湘霞通元命名秀貞皈依龍門余命名曰來淨心恒夫婦此儷一心奉母每日從摩鉢禮朝真斗來淨歸心十年阻於不慈之母從余受大洞玉章經普吉真言易師弟之稱期以甲子日翦髮披緇入空門矣嘗言污濁而生不若清淨而死也余女弟子皈道者七人吳飛卿名來恩李宛卿名來慈劉若卿名來惠許定生名來淑陸湘鬟名來瑩黃蘭姬名來覺段夢香名來智守性另有傳道光乙未五月華胥子序於海上鬱洲宿城山中仙人石屋之玉女窓

西泠仙詠自敘

原序

以仙爲有耶何以廣成偃佺之倫不再見於今也以仙爲無有耶何以黃庭真誥至今珍秘而赤松黃石間亦露端倪於世也畫龍行雨石燕拂雲人或以爲靈也神女獻泉思婦化石人或以爲誠也寺鐘鬪虬岸樹化特人或以爲精也木理成文石言紀異人或以爲憑也湖鴉噪祠海鳥棲舶人或以爲神也蠶蛹飛蛾麥蠹化蝶人或以爲蛻也潛蛟魅人老狐幻叟人或以爲妖也跡其由定生慧自蠢而靈則與凡人之爲仙又何異乎屠可成佛隸可成神况於正直之人傭可入道吏可上昇况於清虛之士特多爲富貴所酣豢愛欲所纏擾耳廣成子曰無勞汝形無搖汝

西泠仙詠卷一原序

一

精老子曰知足不辱知止不殆道之精仙之源也凡學仙者必在山林之中仙人托蹟又多在名勝之地武林巖壑深窈泉石清遠真靈之窟宅也仙者樂於遊焉余生長武林憶生平所見名山甚多莫如武陵之佳所遇仙蹟亦莫多於武林蓋自華信築塘以蓄西湖之水靈氣聚焉屈指武林之仙得五十人軼青城而邁岳陽矣武林之仙最著者莫如葛稚川抱朴子云求仙者要當以忠孝和順仁信爲本若德不修而但務方術終不得長生也陶貞白曰爲仙者以藥石鍊其形以精靈瑩其神以和氣濯其質以善德解其纏唐若山語劉彥廣曰勿食珍羞以增爾祿勿衣綺繡以增爾福陰功及物濟人之急道之所重也王山人

語牛知微曰子有道氣而無陰功且更勤修也可知長生之要不在蒸丹煮石之方服霧餐霞之迹矣思於翠淥園營懷仙閣以待諸真簫鸞笙鶴必有翩然而來下者旣爲之詩並論其事以見超然塵瑩者首以修德爲要丹臺石室名籍可通願與同志者共勉之爾

道光丁亥九秋頤道居士序於武昌黃鶴樓

後序

道光丁亥余在漢上刻西泠仙詠二卷並爲之序大意言神仙之說世所必有而於神仙之門徑堂奧未之悉也自是以來十年於茲參究於性命之理推闡於陰陽之故始恍然於神仙之有真不必求之深遠元渺難知也皇古之世無神仙之名亦無煉丹之說廣成子語黃帝言道而已修身以此治天下亦以此老子道家之祖以清淨經爲綱以道德五千言爲目修齊治平一以貫之孔子問禮東歸假年興歎命旣罕言性亦難聞而曾子子思詳言之學庸所載與十翼相爲表裏可尋繹而知也秦皇漢武不明斯旨惟慕長生燕齊方士造爲迂怪之說以惑之沿至六朝

西泠仙詠卷一後序

其流未盡故抱朴子真誥諸書尙沿舊說多言煉丹之法房中之術旁及服食符籙禱祀皆非正宗參同悟真作而命學始明然多以嬰姤爐鼎爲喻雖所言爲一身之陰陽而好異之徒樂於附會故理雖明而道轉晦近代以來真人輩出其書滿家或出自證道之功或出自臨沙所示大約太乙之唱道真言專言煉心爲性學之極功純陽之金華宗旨專言回光爲命宗之密諦趙緣督之仙佛同源伍冲虛之仙佛合宗爲性命雙修之統宗謝凝素之慧命經爲仙佛合一之符券白玉蟾修仙辨惑論張三丰元譚錄彭好古金丹四百字注皆承道脈之淵源以接引後學學道者得所指歸如暗室之寶燈重門之玉鑰矣或謂道陵

臨玉局而證盟威旌陽鎮鐵柱而啟淨名匡氏留蹤於廬  
阜茆君受法於華陽况乎稚川之傳載在東晉貞白所錄  
紀在南齊以爲多沿舊說豈所言皆非歟曰金函玉書兩  
儀之秘寶也懸諸象魏則玩紫文瓊笈二曜之珍錄也陳  
諸列肆則褻故軒皇之簡宛委藏之文命之書龍威守之  
兩師所作亦妙其文字耳機械或未顯焉譬之儒林之外  
編文苑之雜著摛藻爲春不必舉實爲秋也四子六經家  
絃戶誦洙泗濂洛未經親授而宋儒以道統自任淵源付  
託若夜半前席親授口訣者此可笑也道如有統則當歸  
之道家耳溯自伯陽闡化是爲道祖純陽承凝陽正陽之  
緒是爲道宗純陽再傳宗分南北南則王祖重陽傳邱長

西泠仙詠卷一後序

二

春劉長生譚長真馬丹陽郝太古王玉陽孫清淨爲北宗  
七真下而王棲雲尹清和宋披雲徐復陽承之北則劉海  
蟾傳張紫陽張傳石杏林石傳薛道光薛傳陳泥丸陳傳  
白玉蟾爲南宗五祖下而彭鶴林蕭紫霞承之皆傳仙佛  
合一之道蓋仙佛同一工夫同一景象同一陽神證果仙  
言煉精化氣卽佛之出欲界也言煉氣化神卽佛之出色  
界也言煉神還虛卽佛之出無色界也最上乘禪佛同天  
仙大乘禪菩薩同神仙小乘禪同地仙凡夫禪同人仙外  
道禪同鬼仙故佛稱金仙世尊在七佛中成佛華嚴經不  
言七佛而曰七仙也劉海蟾云真箇佛法便是道一箇孩  
兒兩箇抱張紫陽云佛珠還與我珠同我性還同佛性海

仙之與佛又何異乎至於儒之爲道仲尼祖述堯舜憲章文武上律天時下襲水土其推尊也至矣然而敬問伯陽竊比老彭猶龍之歎與顏子高堅前後之言無以異也南宋始振儒宗皆承濂溪之緒太極圖說濂溪得之李之才李之才得之穆修穆修得之种放种放得之陳希夷希夷得易經心法於許堅堅得之陸修靜修靜得之楊羲許穆諸書蓋卽扶桑大帝君命暘谷神王傳魏希賢者卽黃庭內景經也扶桑大帝君卽木公也外景經爲老子所傳大旨相同則固二而一者也老子戒仲尼曰良賈深藏若虛君子盛德若愚去子之驕氣與多慾態色與淫志是無益於子之身非相契之深能如是其切至乎抱朴子曰仲尼

西泠仙詠卷一後序

三

儒者之聖也老子得道之聖也三皇以往道治也帝王以來儒教也老子生於商武丁二十四年庚辰前乎仲尼不知凡幾後天之聖莫不因父母以生因師以教學琴師襄問官鄰子皆師也何獨至於老子而靳之豈玄之又玄不及七齡之項橐乎如來師阿私陀老子師元君先聖後聖莫不有師不第堯師務成伯子舜師蒲衣綠圖矣家語載孔子謂南宮敬叔曰吾聞老聃博古知今則吾師也因與敬叔至周問禮則未見之先業已私淑自居至於贈言奉教自周返魯道彌尊焉弟子進者三千人蓋若是深切著明也而宋儒泥門戶之見以生知推孔子似尼山墮地卽解刪訂纂修者欲以尊聖人而反淺之乎測聖人矣故必



去其膠固之成見而後三教同源之理明宗儒者不難入  
聖悟禪者不難成佛學道者不難成仙也或曰如子之言  
則長生久視不足爲重所云拔宅飛昇者何以稱焉則又  
何事乎求仙何樂於學道也曰欲求神仙在於寶精行炁  
其大要者胎息也無極而太極太極復歸於無極也抱朴  
子曰防堅則水無漉棄之費脂多則火無寢曜之患隱雪  
以違暖經夏藏冰以居深過暑物猶如此况於至人而曲  
學之士動以未見爲疑是習見黔婁原憲之貧而謂古無  
陶朱猗頓之富習見無鹽宿瘤之醜而謂天壤無南威西  
施之美也死而不亾者壽在於性長生不必其炁長生也  
拔宅者八千餘所得仙者十萬餘人載籍所傳固未可爲

西泠仙詠卷一後序

四

典要耳仙經又謂諸得仙者皆其受命偶值神仙之氣故  
值壽宿則壽值仙宿則仙似神仙爲前定此未盡然人生  
先受精神於天地後受氣血於父母天命之性在聖不增  
在凡不減其昧者大約多物欲所蔽耳物欲所蔽多在聰  
明之士蔽者障也處富貴而求道者百人中無一二焉境  
障之也蘊才華而求道者千人中無一二焉名障之也耽  
學問而求道者萬人中無一二焉理障之也垢去而鏡始  
明雲消而月始顯去其障而後道可聞也聞而後可見也  
見而後可求也求而後可得也得而後可守也守而後可  
成也求道之功以主靜爲入門以止念爲初步以心息相  
依爲功法以胎息爲進境所謂固守虛無以養神氣也所

謂無視無聽抱神以靜也所謂存無守有也所謂心滅性現也由是而元關開由是而真種得由是而法身成由是而陽神現道家之書汗牛充棟苟得其道一以貫之可也加以三千行滿八百功完棲神洞府之中翱翔玉清之表真靈位業墉城集仙所記與天地久長日月齊光可也重編西泠仙詠復爲此篇女仙一門另爲之序嗟乎百年瞬息古今彈指鐘鳴鼎食夢幻也金穴銅陵泡影也妻孥繫戀骨肉牽纏恩怨相循寃親不息浮雲也逝水也落花飛絮也蜉蝣蟪蛄也歷觀二十一史賢奸姓氏今之存者何人况灰飛煙滅并姓氏不存者耶某聞道雖晚幸有一隙之明因抒所見並明宗旨以爲迷津之筏暗室之燈五千

西泠仙詠卷一後序

五

退席八百龍沙有夙緣者於茲篇或有取焉

道光甲午六月圓嶠真逸書於海上鬱洲山館

西泠仙詠卷一

目錄

湖上頌軒皇

江上頌虞舜

江上頌神禹

江上詠范少伯

通仙觀詠張道陵

靈隱詠鍾離雲房

江上詠東方曼倩

江上詠梅子真

江上詠嚴子陵

西泠仙詠卷一目錄

仙姥墩詠王方平

臨平詠姚翁仲

江上詠魏伯陽

集慶寺詠陳渾

龍泓洞詠葛孝先

江上詠介元則

鳳皇山郭公泉詠郭文舉

葛嶺詠葛稚川

葛鵑詠葛三郎

稽畱嶺詠許遠游

江上詠王逸少

萬松嶺郭公泉詠郭景純

錢塘詠許黃民

瑪瑙寺詠杜子恭

靈隱詠杜叔恭

錢塘北郭詠孔靈產

錢塘詠徐鸞

孤山詠陸簡寂

曹橋詠潘尊師

山中詠陶貞白師

吳山詠汪越公

肅儀亭詠孫思邈

西泠仙詠卷一目錄

武林詠司馬子微

江上詠賀季真

天竺詠李太白

江上詠葉法善

真聖觀詠呂祖洞賓

錢塘詠施肩吾

六井詠李鄴侯

西湖詠張志和

白公祠詠白香山

天竺靈隱詠李公垂

三生石詠牧童

鶴林道院詠殷七七

錢塘詠王賈

武林詠夏侯隱者

杭州詠杜可雲

龍泓洞詠丁翰之

憩館詠葛參寥

青衣泉詠童子

錢塘詠陳嵩伯卽藍采和

東小江詠吳仁璧

握髮殿詠閻邱方遠

西湖詠杜光庭

西泠仙詠卷一目錄

三

西泠仙詠卷一

懷仙閣定本

圓嶠真逸撰

湖上頌軒皇

湖上諸山發源黃山爲黃帝鑄鼎鍊丹之所武林省會是黃山南支結穴南北兩峯得三天子都靈氣焉

軒皇鑄鼎鍊丹砂一角天都太帝家山勢南來雲海遠潮聲西上越江斜龍飛鳳舞開都會燕語鶯啼驗物華地脈由知得靈氣春城兒女總如花

江上頌虞舜

重華語蒼梧女道士王妙想曰吾昔於民間年尙

西泠仙詠卷一

一

幼冲感太上大道君降於曲室示以道德真經教以修身之道理國之要使吾瞑目安坐至南方之國曰揚州上直斗牛下瞰淮澤又曰大道在內不在外在身不在他人玄經所謂修之於身其德乃真古有言曰修道如初得道有餘多是始勤終怠前功併棄也命侍臣以道德二經及駐景靈丸授之後妙想白日昇天茲山以舜修道之所故曰道州營道縣見集仙錄會稽有虞舜巡狩臺見圖經亦爲地官見神仙通鑑

重華原是古神仙側陋親承太上傳東觀曾過登岱路南巡正憶省方年靈源九派流丹液名嶽三宮隔紫煙秘笈

解叅王妙想幾人白日更昇天

江上頌神禹

大禹治水至巫山爲上古鬼神龍蟒之宅護其巢  
穴杳冥晝晦迷惑失道與雲華夫人相值拜而求  
助敕侍女授以敕召鬼神之書因命其臣狂章虞  
余黃魔大翳庚辰童律爲之佐斲石疏波以循其  
流禹詢於童律知爲金母之女西華少陰凝氣成  
真與道合體援禮瑤臺拜而問道示以天參玄玄  
地參混黃人參道德之要命侍女陵雲華出丹玉  
之笈開上清寶文以授之遂能導波決川以成其  
功天錫玄圭以爲紫庭真人見墉城集仙錄禹穴

西泠仙詠卷一

二

紀禹陵在會稽杭州以禹杭得名亦爲水官

瞿唐龍蟒阻通津親向巫山禮上真少室誕靈忘癸甲長  
淮息浪鎮庚辰雲雷鼎上圖魍魎嶽瀆經中奠鬼神隔岸  
晴霞見祠廟梅梁花放十分春

江上詠范少伯

范蠡字少伯計然弟子佐勾踐滅吳霸越泛五湖  
而去自稱陶朱公迹其生平始則奉勾踐夫婦臣  
服於吳以子胥之忠諫而不能害大功甫成脫屣  
遠去知幾其神蠡也有之神仙通鑑謂爲岐伯後  
身有以夫

注到陰符第幾篇還家壯士錦衣鮮陶朱計定傾吳日黃

老功成霸越年一舸載來人似玉五湖歸去月如煙三高  
祠宇今猶在誰更將金鑄浪仙

通仙觀詠張道陵

張道陵留侯九世孫父翳客吳之天目山母林氏  
夢神人自北斗魁星中降以薔薇香草授之遂感  
而孕生於沛七歲遇河上公授道德經及長博綜  
五經爲大儒往來吳越從學者千餘人計功名無  
益於身心乃鍊長生之道居陽羨山中訪曹洞玄  
於西洞庭舉直言極諫科拜巴郡江州令詔舉賢  
良方正不起居北邙得丹書篆文遇殷長生識之  
入吳遇魏伯陽丹道愈明初居陽平山娶雍氏生

西泠仙詠卷一

三

二子三女入蜀治蛇虎得王長趙昇爲徒太上降  
之授以盟威正籙治八部鬼神與會盟於青城山  
黃帝壇下妖癘衰息乃立二十四治使十二神女  
入陽山井中教獵者以汲泉煮鹽之法真人召遊  
閭苑朝太上使世世宣布爲人間天師後與眷屬  
居餘汗龍虎山乘白鶴隨老君至成都地湧玉局  
而坐重演正乙盟威之旨授正乙真人之號以籙  
劍冊印授長子衡與雍夫人乘黑龍紫車上昇今  
臨安神山觀餘杭通仙觀陽羨張公洞是其地也  
劍印森嚴統百靈驅除妖癘掌雷霆須知正乙盟威品卽  
是文昌大洞經并偃魚龍千廩白山環龍虎萬峯青真人



位業天仙福北斗光中第幾星

靈隱詠鍾離雲房

南天竺寺今下天竺寺也晉僧慧理開山方丈曰佛國山法堂二字乃雲房鍾離權書甚奇古見武林舊事神仙鍾離權不知何時人間出接物五代之世頻游人間嘗草其所爲詩字畫飄然有凌雲之氣又云生於漢從周孝侯征齊萬年兵敗入山遇許堅及王元甫傳道入崆峒自稱都散漢善書見列仙傳宣和書譜雲麓漫抄夷堅志著靈寶畢法破迷歌以傳洞賓靈隱山門榜曰絕勝覺場仙翁葛洪所書見靈隱寺志又云宋之間書道藏言

西泠仙詠卷一

四

卽楚將鍾離昧兵敗入南山成成道爲火龍真人後身爲季漢關公再世爲雲房也

山堂青積漢時煙都尉泉亭合共傳名將從來工翰墨書家多半屬神仙蒼龍東闕蕭何體靈鷲西湖慧理禪莫詡延清舊題字雲房還在稚川前

江山詠東方曼倩

東方朔字曼倩平原厭次人仕漢武帝至大中大夫史記漢書有傳其靈蹟見漢武內傳十洲記列仙傳云東方朔楚人也武帝時拜爲郎宣帝初棄郎去以避亂政後見會稽賣藥謝靈運會吟云范蠡出江湖梅福入城市東方就旅逸梁鴻去桑梓

正詠其事旅客也逸放也樂府解題曰會吟其致  
與吳趨同會謂會稽

執戟曾經侍武皇茂陵回首感蒼茫遠從徐福求三島笑  
看侏儒飽一囊謝客詩中懷旅逸夏侯贊裏憶賢良韓康  
賣藥誰親見倘有神仙不死方

江上詠梅子眞

子眞名福九江人爲南昌尉居家常以讀書養性  
爲事元始中王莽專政上書言王氏太甚不報一  
朝棄妻子去九江至今傳以爲仙其後人有見福  
者於會稽變姓名爲吳市門卒

銅人淚溼故宮花新室亡劉事可嗟吳市尙傳門卒里富

西泠仙詠卷一

五

春何處女兒家

嚴子陵婦  
福女也

朱翁樵徑迷春雨伍相簫聲隔

暮霞倘過泉亭都尉治粟山城郭感棲鴉

江上詠嚴子陵

子陵釣富春江上今桐廬也光武願得相助爲理  
往來洛陽則江上有羊裘之蹟矣又雲笈七籤道  
教相承錄載第十四代劉政授嚴光又載左元放  
授嚴光女李佗神仙眷屬猶使人緬想高致

七里清瀧接富春高臺終古鬱嶙峋隱居自合偕仙女天  
子居然重故人江上科頭臥雲月夜中伸足動星辰扁舟  
賸有羊裘在依舊煙波理釣綸

仙姥墩詠王方平

王遠字方平東海人博學五經明天文圖讖河洛之要孝桓帝徵之不起居太尉陳耽家三十餘年一旦化去仙姥墩在清波門外姥善釀酒方平嘗就沽飲授藥一丸以償酒價姥後仙去人於洞庭見之方平又嘗降吳門蔡經家見麻姑擲米成丹砂方井在秦亭山下相傳方平曾飲此泉也

蘇臺曾見擲丹砂更喜西湖酒可賒方井泉清留舊蹟洞庭人去渺天涯書摹魯國仙壇記春在餘杭阿姥家我有金貂思貰醉青山何處碧桃花

臨平詠姚翁仲

姚俊字翁仲錢塘人仕至交趾太守漢末入增城

西泠仙詠卷一

六

山學道遇東郭幼平教行九鍊精氣輔星在心之道官東華宮中節度苗裔至今在錢塘臨平其墳壇歷然時聞鼓角之響皆知爲姚司命塚幼平秦時隱增城山得道者也

當年訪道入增城東郭先生一卷經仙籙頭銜雲篆碧墓門鼓角晚山青金華宗旨參新訣銅柱關山問舊銘今日皋亭西畔過夕陽衰草滿迴汀

江上詠魏伯陽

魏伯陽上虞人號雲牙子性好道術師事陰徐二真人與弟子三人入山作神丹丹成與犬食犬卽死自食之入口亦死一弟子曰吾師非常人也服

此而死得無意也取丹服之亦死餘二弟子相謂曰所以得丹者欲求長生也今焉用此乃共出山求棺伯陽卽起將所服丹納弟子及白犬口中皆起遂皆仙去作叅同契五行相類假借爻象以論作丹之意世儒多作陰陽注之失其旨矣

一卷叅同萬古傳盡將道妙洩先天陰徐師表承前輩鍾呂淵源啓後賢消息潛通周易理闡揚宜證悟真篇闡丹爐火都研究我是金牀馬自然

### 集慶寺詠陳渾

漢熹平中令茲邑築南溪塘三十里號曰南湖民懷其德立廟湖上唐長慶中封太平靈衛王俗所

### 西泠仙詠卷一

七

祀天曹神是也歐陽修唐書地理志記歸珖開湖築甬道因渾舊迹樊榭文集漢陳渾爲餘杭令有功於民民爲立祠曰陳明府祠在集慶寺西見明

### 一統志

漢家賢宰餘杭令贍此遺祠奠兩楹山水中間畱俎豆循良傳裏有神明後來蘇白多遺蹟並世襲黃少盛名我亦江南久浮宦寒泉一盞酌宗盟

### 龍泓洞詠葛孝先

葛元字孝先誦清淨經而得道有道德經序稱太極左仙公以丹經付弟子鄭隱隱以授元從孫洪卽稚川也見晉書葛洪傳葛翁鍊丹之所今日葛

鳴在靈隱吳方士葛孝先所居見元豐九域志及輿地志孝先從左元放授九丹金液仙經吳大帝欲加榮位意不欲住腹痛而臥須臾死臭爛蟲生不可復近尸失所在又去遊會稽號葛仙公以其煉丹秘術授弟子鄭隱洪就隱學悉得其傳龍泓洞在飛來峯一名巖石室一名通天洞晏殊類要云吳赤烏二年葛仙翁於此得道以年代度之在稚川前當是元耳南屏山有幽居洞相傳葛仙翁修煉之所或亦元遺蹟也

迴龍橋畔臥犀泉青壁芙蓉好洞天學道偶居靈鷲麓登真應憶赤烏年蒼茫舊宅懷句曲轉輾丹經付稚川極目

西泠仙詠卷一

八

初陽臺畔路神仙畢竟有家傳

江上詠介元則

介象字元則會稽人學通五經後學道入東山善度世禁氣之術吳王徵至武昌稱爲介君詔令立宅從學隱形之術後言病賜以美梨食之便死晡時至建業以梨付苑吏吏種之以表聞與立廟祭時有白鶴來集座上

夕陽何處介君祠江水江雲我所思黃鶴樓前曾立宅赤烏碑上合題詩前緣或者知于吉同輩惟應數左慈贏得梨香宮苑在瀛洲玉雨賞花時

鳳凰山郭公泉詠郭文舉

文舉名文河內軼人洛陽陷入餘杭大滌山中倚木於樹苔覆其上居十餘年猛獸害人獨不害文區種菽麥採竹葉木實買鹽以自供食有餘穀輒恤窮匱嘗有猛獸張口向文視有橫骨乃以手探去之嘗使負鹽入市繫之郵亭日暮虎飢而嗥今之嗥亭是其遺蹟王導迎置西園朝士咸共觀之頽然箕踞旁若無人温嶠嘗問曰飢而思食壯而思室人之情也先生獨無情乎文曰思由憶生不憶故無情又問曰先生獨處窮山若疾病遭命爲烏鳶所食顧不酷乎文曰埋藏者亦爲螻蟻所食亦何異乎又問曰猛獸害人顧獨不畏耶文曰人

西泠仙詠卷一

九

無害獸之心則獸亦不害人居西園七年未嘗出入一旦忽求還山不聽逃歸臨安山中及蘇峻反破餘杭而臨安獨全人皆異之以爲知機見晉書隱逸傳泉出巖竇間相傳文舉所鑿多不盈掬久旱不竭明僧明秀更名許僧泉方豪篆名鑿壁見錢塘縣志

秣陵曾訪讀書臺又見清泉此地開蘊藻紋深橫舊石葫蘆水冷浸寒苔梵天古寺鰻何在元蓋孤雲鶴未回失笑文人輕篆壁當年不爲許僧來

葛嶺詠葛稚川

葛洪字稚川句容人少時尋書問義尤好神仙導

養法從祖元得仙以丹術授弟子鄭隱洪乃就隱  
學悉得其法後師鮑元元以女妻洪洪傳元業兼  
綜醫術見晉書本傳稚川隱西湖山以仙著初聞  
郭文舉在大滌造請焉修真著書號抱樸子葛嶺  
在寶石山西亦名葛鳴相傳是洪煉丹處湖上諸  
山多洪隱蹟居靈隱山丹竈猶存見二寺記天竺  
山下有葛洪煉丹井見輿地記定山慈惠院太康  
間葛稚川捨宅爲寺見臨安志太平廣記載三生  
石事有葛洪川許渾有題天竺寺葛洪井詩雷峯  
小蓬萊相傳洪棲煉於此靈隱寺額相傳洪書  
曾從句漏乞丹砂飽看羅浮萬樹花是處深山堪避世一

西泠仙詠卷一

十

車行具此移家松陰古井澄寒水雲裏高臺麗曉霞我與  
神仙多夙契靈樞也學種蘭芽

葛鳴詠葛三郎

會稽崔希真冬日見負薪老叟立雪中問之云姓  
葛第三崔畱食大麥湯餅自促備饌方張絹欲召  
畫工爲圖叟取几上筆畫一枯松一採藥道士一  
鹿隨之迅逸高古非世所有識者曰此稚川子葛  
三郎畫也後遇之灞橋驚蔬蔬就之負蔬去

蘭亭修竹積濃陰偶渡江皋步水潄雪裏飛鴻畱隱蹟畫

中馴鹿見仙心外家林屋包山古

包山卽鮑山以鮑靚所居得名三郎母鮑姑靚

也舊宅丹房葛鳴深隨處煙霞足樓飲寒樵老圃是知音

稽留峯詠許遠游

許邁字叔元小名映改名遠游東華署爲地仙見  
眞靈位業圖邁句容人少恬靜不慕仕進南海太  
守鮑靚隱迹潛遁邁往候之採其至要謂餘杭懸  
雷山近延陵之茆山是洞庭西門潛通五嶽陳安  
世茆季偉常所游處於是立精舍於懸雷而往來  
茅嶺之洞室永和二年移入臨安西山登巖茹芝  
有終焉之志著詩十二首論神仙之事見晉書本  
傳許邁建思眞堂於靈隱山見陸羽二寺記靈隱  
稽留峯卽遠游嘉遯之所邁自餘杭懸雷移入靈  
隱見西湖遊覽志

西泠仙詠卷一

七

潛通五嶽采眞回懸雷深山精舍開南海解尋高隱去東  
華曾署地仙來三生石上中秋月千歲巖前太古苔舊是  
先生嘉遯處茹芝園綺共徘徊

江上詠王逸少

逸少東歸會稽誓墓不出錢塘山水精華未發非  
止山陰道上千巖競秀萬壑爭流也神仙通鑑稱  
爲書宗先生新齊諧言天上寫紫清煙語品書以  
索幼安爲第一逸少爲第十蹟其換鶩之作黃庭  
道德流傳人間與道士管霄霞往還煙霞之致深  
矣

又上輕航渡浙西雲門山寺入耶溪黃庭書罷鶩爭浴蘭



潛花開鳥亂啼巖壑肯將經濟換煙霞許共室家攜如何  
誓墓歸來日不住錢塘住會稽

### 萬松嶺郭公泉詠郭景純

景純名璞河東聞喜人好經術博學有高才慕古  
文奇字從郭公受青囊洞五行天文博筮之術京  
房管輅不能過也惠懷之際河東先擾璞避地東  
南王導引叅軍事於時陰陽錯謬刑獄煩興璞屢  
上書言事又以太高位卑乃著客傲以母憂去職  
未期起爲王敦叅軍敦謀逆爲所害蓋兵解也追  
贈宏農太守璞撰洞林新林卜韻注釋爾雅別爲  
音義圖譜又注三蒼方言穆天子傳山海經及楚

### 西泠仙詠卷一

三

詞子虛上林賦數十萬言又所作詩賦誄頌數萬  
言並游仙詩皆傳於世見晉書本傳泉在嶺下相  
傳景純所鑿其時杭城濱江斥鹵艱得甘泉度地  
脈非景純不識也見游覽志

白鼉前世感精靈古井空山話野亭江賦書成銘彩筆仙  
詩吟罷吸銅瓶情深紅粉三升豆名重青鳥一卷經我憶  
金山弔遺墓清泉曾與味中泠

### 錢塘詠許黃民

字元文家有上清真經魏夫人授弟子楊羲傳黃  
民祖穆父翹先後隱化永興初京畿亂黃民奉經  
入剡爲東閩馬朗所供養元嘉六年將移居錢塘

封其真經一厨付朗分持經傳及雜記自隨及至  
錢塘杜道鞠家少時而終穆一名謚字思亢邁之  
弟也婦陶科斗女弟娥皇中男聯字元暉小名虎  
牙小男名翽字道翔小名玉斧婦黃敬儀卽娥皇  
女黃民孫女道育瓊輝並得度世詳見真誥蓋其  
時佛法未盛人多奉道潤以文藻有神仙眷屬之  
意如許氏者亦其著也

香嬰深護篆煙浮珍重經文奕世雷絳闕隱書傳世系華  
陽真誥溯靈修牙箱軸富緡新籙雲笈籤多下幾籌玉佩  
金璫仙眷屬攀星還擬禮辰樓

瑪瑙寺詠杜子恭

西泠仙詠卷一

三

晉書孫恩父泰字敬遠師事錢塘杜子恭子恭有  
秘術常就人借瓜刀其主求之子恭曰當卽相還  
耳刀主行至嘉興有魚躍入舟中破魚得刀其神  
效往往如此子恭死泰得其術及泰誅衆惑之皆  
謂蟬蛻登仙矣南齊山陰孔靈產過錢塘北郭輒  
於舟中遙拜杜子恭墓宋書沈約自序杜炅字子  
恭通靈有道術約先世有沈警者敬事子恭按墓  
在錢塘縣北南齊時所謂錢塘北郭猶水經注靈  
隱山下錢塘故縣江經其南則北郭亦近湖之地  
也舊志有杜運子恭之孫俗傳瑪瑙寺左有杜子  
恭墓倪璠神州古史考曰杜子恭者神方驗於晉

史冢墓載在齊書蓋黃公道術之流葛洪神仙之比也

黃公道術葛翁篇魚腹瓜刀事偶然何處鶴棲曾寄蹟有人蟬蛻說登仙暮雲樓閣西泠樹落日帆檣北郭船瑪瑙寺前埋骨處紛紛遙拜墓門煙

靈隱詠杜叔恭

叔恭名曷錢塘人少孤有名鄉郡命仕不就師餘杭陳文子受治爲正一弟子感神人張鎮南降授秘方太傅謝安見黃白光以問曷曷曰君先世陰德及物君當位極人臣也他若策謝元淝水之捷料桓温枋頭之敗燭盧竦之入宮防孫泰之惑衆

西泠仙詠卷一

古

前知之異有靈徵焉歿後弟子立碑諡曰明師見洞仙傳謝奐以子寄養當卽其人按宋書杜炅字子恭通靈有道術見沈約自序名字相類或是兄弟行也

錢塘高士杜明師靈隱山前有舊基桓謝行軍機早定孫盧惑衆數難移親緘秘籙貽諸子別起新亭待客兒北郭墓門遙拜處何人棠棣爲題碑

錢塘北郭詠孔靈產

靈產名默會稽山陰人泰始中罷晉安太守有隱遁之懷於禹井立館事道精篤東出過錢塘北郭於舟中遙拜杜子恭墓並從許黃民求楊許真書

令郡吏王興繕寫見真誥及雲笈七籤子稚圭卽  
撰北山移文諷周彥倫者

晉安歸棹晚煙遲北郭曾經禮導師豈有丹經傳鄭隱可  
無仙館立楊羲陰陰桑柘尋遺宅鬱鬱松楸訪舊碑省識  
家風知慕道兒曹解賦北山移

錢塘詠徐彎

徐彎吳郡海鹽人少有道炁能收束邪精錢塘杜  
氏女患邪彎召魅叱之成白龜一旦與從兄弟登  
石碕山斫柴日暮不返明日尋覓見倚樹不動抱  
之惟有空鼓見洞仙傳

城北徐公美若何居然應器與降魔一潭枯水浮朱鼈三

西泠仙詠卷一

五

尺靈潭走白鼈此日空林蟬共蛻他年華表鶴應過石碕  
山下畱蹤處絕似仙人爛斧柯

孤山詠陸修靜

名修靜烏程人事母至孝晉衰不仕奉母入金蓋  
山故多梅增植之歲足代耕榜所居曰梅花館凌  
義渠謂和靖植梅有祖其先生歟母病思鱸釣於  
溪獲二尾烹其一龍子也翁乞其一還之後過鏡  
湖舟覆一少年負而出蓋以報云母沒後作道士  
裝周遊溢浦廬山間與淵明慧遠結白蓮社嘗至  
秣陵居鍾山茱萸館爲劉宋客而不臣卒諡簡寂  
廬山簡寂觀是其遺址法籙稱靈寶天師

種梅人去渺天涯金蓋山前有舊家香雪中調鶴地晚  
霞溪上釣龍槎秣陵月落煙橫黛廬嶽雲深瀑瀉花誰是  
高蹤繼蓮社虎溪三笑最風華

曹橋詠潘尊師

杭州曹橋福業觀有潘尊師虛襟大度行功濟人  
有少年詣之避難六十日臨別授正一九州社令  
錄階自後靈官傳報四海之內無不知之厥其喧  
聒却之不可乃食肉啗蒜以却之一日少年來曰  
汝犯真靈罪當冥考別授一術廣行陰功用贖前  
過後來言諸天方外之事歲餘尸解

九天龍虎守雲都金籙分明總玉樞掌上觀紋千里見耳

西泠仙詠卷一

六

根郵報萬靈趨神君帳裏傳丹訣力士壇前秉赤符何處  
曹橋舊仙觀春城煙樹夕陽孤

山中詠陶貞白師

貞白先生南史有傳謝淪先作陶先生小傳甚簡  
華陽隱居先生本起錄則從子翊所撰也云庚午  
年啟假東行浙越尋求靈異至會稽大洪山謁居  
士婁慧明至餘姚太平山謁居士杜京產至始寧  
宛山謁法師鍾義山至始豐天台山謁諸僧標及  
諸處宿舊道士並得真人遺蹟十餘卷東陽長山  
吳興天目無不經歷見雲笈七籤則湖上諸山當  
有先生游蹟矣廣陵通元壇余從問道師所主也

笑謝浮名署隱居華陽彷彿似華胥松吹夜月鷺笙香碑  
墮空江鶴夢虛曾與褚劉敦古誼親承楊許有真書名山  
都是經行處石室金庭問舊廬

吳山詠汪越公

汪華字子華小字興哥父彥饒於財以鉅貲俾習  
賈因至鄞之普陀遇豪客劉琮方困悉以資之隋  
亂得琮力保障六州唐初歸命封越國公後與琮  
同爲徐張二真所引入潮音洞修道成真宋封靈  
惠公明封廣濟靈惠王海內汪氏富貴顯達者皆  
公後人保境息民流澤遠矣余子婦爲公四十七  
世女孫與公同正月十八日生謂新舊唐書不爲

西泠仙詠卷一

七

公立佳傳當是公子孫有富名宋初秉筆諸人有  
陳承祚乞米之意而未遂也杭爲保障六州之一  
祠在吳山

六州保障重勳名早識真人罷甲兵陌上看花錢武肅中  
原采菽李長生西來山勢雲無際東下江潮月有聲何事  
魏收工乞米不將佳傳表登瀛

肅儀亭詠孫思邈

思邈京兆華原人七歲就學日誦千言及長好談  
莊老百家之說周宣帝時隱太白山學道洞曉天  
文推步精究醫藥務行陰德嘗救小蛇涇陽龍子  
也得入水府授龍宮禁方三十首因著千金方三

十卷龍宮方散其內又著脈經唐太宗高宗朝授  
以侯爵固辭永徽三年尸解見續仙錄肅儀亭在  
上天竺有無竭泉一名孫公泉相傳爲思邈洗藥  
處

高臥空山不計年肅儀亭畔鬚苔圓偶攜處士烹茶具來  
試仙人洗藥泉鷲嶺應畱遺蹟在龍宮曾有禁方傳隱居  
絕似陶貞白管領華陽好洞天

武林詠司馬子微

子微名承禎河內人博學能文工篆隸少事中嶽  
體元先生潘思正傳其符籙及辟穀導引服餌之  
術隱天台山玉霄峯自號白雲子則天睿宗元宗

西泠仙詠卷一

六

屢加徵召有寶琴花帔之賜寫三體道德經撰修  
眞秘旨論五嶽眞人因建眞君祠詔於王屋山自  
選形勝以居弟子甚衆女眞焦靜眞靈識精思至  
方丈山遇二仙女謂曰子欲爲眞官可謁東華青  
童道君請其名氏謂子微也蜀女眞謝自然泛海  
將詣蓬萊求師至一山遇一道士言天台山司馬  
承禎名在丹臺身居赤城眞良師也乃回求受度  
白日上昇見雲笈七籤李太白大鵬遇希有鳥賦  
爲子微作也

赤城王屋總名山都有仙居杳靄間五嶽眞形畱帝闕九  
重前席謝天顏悔橋終古寒飛瀑捷徑當年冷閉關玉女

雙修俱絕世寶琴霞帔禮星鬢

江上詠賀季真

季真名知章四明人官秘書監李白游長安知章  
遇之呼爲謫仙人解金龜換酒晚乞歸四明自號  
四明狂客乞賜鑑湖一曲又神仙傳知章以天寶  
末入四明山中餌藥上昇見胡稚威懷仙堂記

賞醉金貂尙有無山公騎馬兩鬢扶謫仙樂府新詩卷狂  
客生涯舊酒徒二頃水田謀鶴俸十年歸計戀漁租如何  
祇放稽山棹不乞西湖乞鑑湖

天竺詠李太白

太白謫仙人也長庚英英上匹歲星與許宣平司

西泠仙詠卷一

九

馬子微遊安陵遇蓋還爲造仙籙生爲人中之仙  
沒爲仙中之人徵其靈蹟屢見載籙杭州天竺爲  
白遊蹟所經有與從姪刺史良同遊詩云挂席凌  
蓬邱觀濤憩樟樓三山動逸興五馬同遨游天竺  
森在眼松門驚颺秋覽雲測變化弄水窮清幽疊  
嶂隔遙響當軒寫歸流詩成傲雲月佳趣滿吳洲  
又杭州送裴大澤時赴序州長史詩與肅宗二年  
虎邱夜讌詩序皆爲確證故余有西湖及虎邱建  
太白樓之議近年賀耦耕董琴南萬浣雲諸君建  
慕李軒於虎邱白公祠汪少海屠琴鳴諸君建李  
杜祠堂於西湖金沙港從余議也



觀濤風雨憩樟樓逸興曾偕五馬遊放眼三山窮巖嶂當  
軒衆壑寫歸流酒杯綠泛金尊夜花港紅銷畫舫秋黃鶴  
倘來應有伴月華寒照翠雲裘

江上詠葉法善

法善字道元處州松陽人父慧明祖重四世修道  
七歲溺松陽江三年復還父母問故曰青童引我  
朝太上師青城山趙元陽受遁甲入蒙山神人授  
書詣嵩高山嶽神授劔遂居卯酉山投符起石游  
括蒼山遇三神人告曰子本太極左仙卿以校錄  
不勤謫人世宜立功濟世佐國當復舊任授以正  
一三五之法自是四海六合名山洞天咸所周歷

西泠仙詠卷一

辛

誅蕩精怪掃馘妖邪叔靜能薦之拜上卿辭乞爲  
道士以黑符誅瓜洲白魚以丹符救東海龍發蕃  
使凶函知張果前生爲混沌時白蝙蝠精攝李北  
海魂使書碑與明皇涼州觀燈入月宮聽紫雲迴  
曲仙蹟不可勝紀錢塘江有巨蜃爲害淪溺舟楫  
投符使神人斬之除害殄凶功德尤遐被也明皇  
詩云清溪道士人不識上天下天鶴一隻洞門深  
鎖白雲閒滴露研朱點周易贈法善也卒年百有  
七歲贈金紫光祿大夫諡有道先生

清溪道士葉尊師身歷三朝作羽儀東海清泉龍叟報西  
園醇酒麴生知涼州夜市金錢富月殿新聲玉遂遲滴露

研朱點周易九天雲鶴聽吟詩

真聖觀詠呂祖洞賓

萬歷錢塘縣志載觀中蕉花盛開有道士趙肖先居之一日有羽客來訪適趙他出客題詩蕉葉曰午夜君山玩月回西鄰小圃碧蓮開天風香霧蒼花冷名籍因由問汝來又曰白雪紅鉛立聖胎美金花要十分開好同子往瀛洲看雲在青霄鶴未來相傳以爲呂祖寄託也揭傒斯有真聖觀蕉花訪仙人題詩處詩真聖觀今圓妙觀在吳山麓

蕉花原是美金花有客來尋羽士家仙蹟曾勞駐黃鶴朗吟應復倚青蛇春深瀛海看雲氣夜靜君山玩月華我欲

西泠仙詠卷一

三

西鄰營小圃綠天菴畔種靈芽

錢塘詠施肩吾

肩吾字希聖睦州人唐元和中進士隱洪州西山矢志不仕有詩曰氣本延年藥心爲使氣神能知行氣主便是得仙人呂祖游睦見其趨尙烟霞授以還丹大道見修真傳道集序有春日錢塘雜興

詩

西山高隱慕仙家碧洞青蘿覽歲華鶴夢冷棲松際月猿聲寒嘯嶺邊霞蠶娘門外籠桑葉酒姥溪頭種藕花采藥空林招野客也同句漏乞丹砂

六井詠李鄴侯

李泌字長源守杭州以郡城泉水惡開六井引湖水以便民曰相國井曰西井曰方井曰小方井曰白龜池曰金牛井白香山陳述古蘇軾周滄趙與籌皆重浚之今雖遺趾不盡可考而流澤沾溉已二千年於茲矣泌幼年能於屏風上立空中嘗有天樂來迎宿嵩山遇僧嬾殘煨芋食之有領取十年宰相語安史之後再造唐室廣平王贈詩有夜抱九仙骨朝披一品衣句旣薨中使林遠遇於逆旅單騎常服云往衡山其爲仙也無疑矣

遺愛長思李鄴侯曾聞六井引湖流銀牀急雨千門足  
茆屋炊煙萬戶謳芋火暖分枯衲夜菊泉寒薦水仙  
秋簫鸞笙鶴歸何處擬築新宮起畫樓

西泠仙詠卷一

三

西湖詠張志和

志和山陰人號元真子擢進士善畫飲酒三斗不醉肅宗嘗賜奴婢二人志和配爲夫婦曰漁童樵青守真養氣臥雪不寒入水不濡天下山水皆所遊覽與顏魯公善魯公守湖州與陸鴻漸徐士衡李成矩唱和漁父詞二十五首魯公東遊平望志和酒酣爲水戲鋪席水上獨坐飲酌嘯詠有雲鶴隨覆其上揮手以謝上昇而去見續仙傳

圓波吹雪鯊魚肥漠漠晴煙溼翠微隱逸生涯新釣艇  
神仙蹤蹟舊漁磯晚山何處青鸞去春水依然白鷺飛我亦

武陵源外住桃花亂點綠蓑衣

白公祠詠白香山

白居易字樂天太原人晚號香山居士嘗爲杭州刺史三年建石函以通湖水築隄捍田人稱白公隄自石函橋北至餘杭門者是也遺愛孔多民謳思之嘗有人於海上見仙龕云以待白侍郎祠在孤山爲阮琅嬛先生撫浙時所建

一湖春水潤平沙碧琰青蘿玩物華歸去偶攜天竺石重來應憶紫陽花夢回翠黛雲長好拍按霓裳月未斜何處仙龕滄海上醉吟應復憶蘇家

天竺靈隱詠李公垂

西泠仙詠卷一

三

公垂名紳亳州人與李文饒元微之齊名號元和三俊爲人短小俗呼短李少時與友同止西山舍見一老叟心知異人拜之曰子知唐若山乎某是也今夕南海羣仙會羅浮山能隨我游乎子合名紳字公垂旣至衆曰異哉公垂非名係仙籍何路得來能我從乎曰紳未立室不獲辭恐若黃初平貽憂於兄弟羣士已知念歸覓一物乘之似在華山北乃羅浮店也後累官中書侍郎平章事有憶杭州天竺靈隱二寺詩

高峯斜日暝煙收一樣檀林擁石樓佛國有緣今再到仙山何事不重游雲間鐘磬飄僧榻江上旌旗送客舟惆悵

猿猱苦相憶月華寒嘯洞門秋

三生石詠牧童

唐李源與僧圓觀友善相約遊峨眉至南浦見婦人錦襜負甕而汲觀曰此婦孕三歲矣吾不來故不得乳今既見無可逃者後十三年中秋夜當與公相見於杭州天竺寺遂亡源後自洛適杭中秋月夜於葛洪井畔見有牧童菱角騎牛而歌曰三生石上舊精魂賞月臨風不要論慚愧情人遠相訪此身雖異性長存又歌曰身前身後事茫茫欲話因緣空斷腸吳越溪山尋已徧恰迴煙棹上瞿塘歌竟拂袖入煙霞而去觀此則牧童不昧前因

西泠仙詠卷一

一

抑已仙矣石在蓮花峯下

解從身後說身前知爾今生已得仙影踏疎林秋有蹟路尋幽澗夜無煙錦襜遠夢人千里菱角長歌月一天何處青山最堪憶蓮花峯下葛洪川

鶴林道院詠殷七七

七七名文祥又名道筌周寶於長安識之及寶移鎮浙西七七忽至賣藥寶驚召之師敬益甚每醉歌曰解醞逡巡酒能開頃刻花琴彈碧玉調爐養白硃砂試之悉驗嘗於鶴林寺感仙女九日開杜鵑花後於甘露寺爲衆推落北崖咸謂墮江死矣後有人於江西見之見續仙傳

回首長安舊夢賒春山采藥踏煙霞壺中造化逡巡酒世  
外春秋頃刻花九日笙歌圍絳樹一房爐火煉丹砂鶴林  
女子知何處倘是仙人萼綠華

錢塘詠王賈

太原人嘗與諸父至太行南泌河觀兩龍爲婺州  
叅軍與杜暹過錢塘江登羅刹山觀浙江潮謂暹  
曰大禹眞聖者當理水時所有金匱玉符以鎮川  
瀆若此杭州城不鎮壓尋當陷矣因與暹至水底  
觀之

波恬羅刹息驚湍中有風雷護法壇林屋寶符深洞闕禹  
陵窆石隔江看鮫人弄杼冰綃薄龍女簪花月鏡寒不是

西泠仙詠卷一

三五

仙翁親指點誰知萬古慶安瀾

武林詠夏侯隱者

不知何許人游茆山天台間攜布囊竹杖而行或  
露宿草間樹下人窺覘之但見雲氣不見其身登  
山渡水閉目善睡而不差跌人號睡仙昔常熟蔣  
文肅得不寐之疾夢隱者教以未睡目先睡心行  
之良驗因於道觀墀像奉之

睡鄉原是黑甜鄉行止皆甜味更長華頂當年曾寄蹟琴  
河有客解焚香布囊聊作游仙枕竹杖權爲夢蝶牀我本  
希夷老孫子華胥應許聽宮商

杭州詠杜可雲

杜昇字可雲京兆杜陵人好於水椀及盆內以沙書龍字浮而左右叱之則飛可丈餘隱隱作小龍形呼之復下水中杜孺休邠國公琮子也爲蘇州牧延入呼爲道翁云邠國鎮西川日與翁處四十餘年顏貌如當時也咨以道術勸以教化及人慈惠爲意或與賓僚倡和出口成章多神仙旨趣後軍亂人見可雲被傷頃之但見舊衫破痕後數日人見過松江浙江經杭越衢信入江西市醉吟沙書如故云將歸南嶽也

隨意書龍便是龍蜿蜒無際動虛空有時得氣飛雲外依舊聞呼入水中蜀道夢回江樹碧杜陵家近苑花紅西江

西泠仙詠卷一

美

避蹟歸南嶽回鴈峯前憶此翁

龍泓洞詠丁翰之

唐丁飛舉字翰之隱居錢塘深山有憩館在龍泓洞善養生能鼓琴綸巾布裘貌古而意澹年八十六齒髮不衰升高望遠不異平地時時書細字作文記事皆有楷法意義夜半山靜取琴奏雅弄一二少睡寡言笑與人相接禮簡情至人或問其養生之道對曰治心修身之外復有何物陸龜蒙嘗詣洞訪之爲作丁隱君歌云華陽道士南遊歸手中半捲青蘿衣自言逋客持贈我乃是錢塘丁翰之連江大抵多奇岫獨話君家最奇秀盤供天竺

春筍肥琴倚洞庭秋石瘦草堂暗引龍泓潘老樹  
根株若蹲獸霜濃果熟未容收往往兒童雜猿狖  
去歲猖狂有黃寇官軍駭散無人鬪滿城奔迸翰  
之間祇把枯松塞圭竇前度相逢正賣文一錢不  
值虛云云今年利作採山斧可以拋身麋鹿羣丁  
隱君丁隱君昂然且莫別名氏卽日更尋丁隱君  
見笠澤叢書序云雷平山道士葛參寥話與翰之  
熟至今齒髮不衰氣力益壯當卽詩中所云華陽  
道士也觀此隱君其殆有道者歟

何處錢塘丁隱君散人麋鹿亦爲羣盤中玉版登春早壁  
上冰絃響夜分龍湧湍聲喧急雨猿啼清嘯落停雲華陽  
道士如相遇手捲青蘿話夕曛

西泠仙詠卷一

七

憩館懷葛參寥

事見前丁翰之傳觀詩序則參寥與翰之爲方外  
之友均爲有道味詩意則參寥訪翰之於所居翰  
之贈以青蘿衣歸遇魯望因作詩也

衣捲青蘿染翠苔相逢齒髮未全衰記從甫里先生語曾  
訪龍泓處士來句曲洞天原福地稚川家世本仙才華陽  
我亦淵源在松下吹笙日幾回

青衣泉詠童子

泉在寶蓮山三茆觀內唐開成中道士韓道古見  
青衣童子於洞口故名泉上有唐人題名



何處青衣此一童當年靈蹟羽人宮  
山花灼灼欹雙髻秋水明明剪兩瞳  
樓閣高寒金地外澗泉深闕玉天中  
當年親訪題名處閒話淮南憶八公

錢塘詠陳嵩伯卽藍采和

洪州處士陳陶字嵩伯聲詩歷象無不精  
究世居嶺表嚴宇鎮豫章以陶操行高潔  
欲撓之遣妓蓮花侍焉陶賦詩云已向昇  
天得門戶錦衾深媿卓文君謝之後人移  
其事爲圖南也昇元中至南昌築室西山  
宋齊邱不爲薦辟陶有句云中原莫道無  
麟鳳自是皇家結網疎開寶中嘗見一叟  
與老媪貨藥於市獲錢則市酒對飲旣醉  
行舞而歌曰

西泠仙詠卷一

天

藍采和藍采和塵世紛紛事更多  
爭如賣藥沽酒飲歸去深崖拍手歌  
或疑爲陶夫婦嘗有西湖對酒歌云  
風天雁悲西陵愁使君紅旗弄濤頭  
東海神魚騎未得江天大笑閒悠悠  
嵯峨吳山莫誇碧阿陽經年一宵白  
南朝彩鳳爲君生古獄愁蛇待恩澤  
三清羽書來何遲十二玉樓胡蝶飛  
炎荒翡翠九門去遼東白鶴無歸期  
鳴夷公子休悲悄六鰲如鏡天始曉  
尊前事去月團圓琥珀無情憶蘇小  
蓋爲錢氏作也

吾家仙侶世間多又見當年藍采和  
彩鳳南州招未下神魚東海問如何  
山中境靜簪花去湖上春閒采藥過  
太息

生平晚聞道雙修偕隱兩蹉跎

東小江詠吳仁璧

仁璧字廷寶蘇州人一日秦人少習星緯黃白家言唐大順中登進士第已而入浙家貧常佯狂乞於市錢武肅王聞其名待以客禮叩以天象辭非所知辟幕職又以詩固辭及秦國太夫人薨具體幣請爲墓銘堅不肯屬草王怒投之江中有詩一卷行世先是仁璧學於廬山道士數年道士曰能學仙耶仁璧固陳求名之志道士曰一第猶拾芥耳但他年勿干英雄至是遂驗有女年十八能詩精天官之學仁璧被繫女泣曰文星失位大人其

西泠仙詠卷一

无

不免乎未幾王併沈之東小江見十國春秋雅言雜載則云關右人游羅浮洞學老莊於張先生得其大旨武肅請撰羅城記不從怒沉於江建隆初廣南劉隱遣人就羅浮設醮至山頂見石門一叟曰此羅浮先生吳仁璧所居後有人於羅浮句曲諸山見仁璧引十許歲女子是其女也

碧波亭下水犀然東小江頭浪拍天愛士也知虛側席負才聊復託沉淵羅浮洞口花橫雪句曲山中月上煙原是蓬萊舊儔侶郊公攜女共昇仙

握髮殿詠閻邱方遠

方遠字大方舒州宿松人精通詩書學易於廬山

陳元晤問大丹於香林左元澤師事仙都劉處靖  
受法籙於天台葉藏質詮太平經爲三十篇景祐  
中錢塘彭城王錢鏐深慕方遠道德禮謁於餘杭  
大滌洞築室宇以安之昭宗屢徵不就賜號元同  
先生弟子二百餘人天復二年坐化後有人於仙  
都山廬山見之云歸隱潛山天柱源也見續仙傳  
握髮錢王殿名

徧訪名山禮導師偶停元鶴采華芝洞天祇合神仙住丹  
法惟應弟子知何處西泠畱異蹟他年南嶽說歸期君王  
親問空同道春雨靈旗拂故祠

西湖詠杜光庭

西泠仙詠卷一

三

光庭字賓至縉雲人或曰長安人唐咸通中應九  
經舉不第遂入天台山學道潘尊師薦之從唐僖  
宗幸興元遂畱蜀事蜀王建爲諫議大夫封蔡國  
公賜號廣成先生後主立受道籙於苑中以光庭  
爲傳真天師崇真館大學士未幾解官隱青城山  
號登瀛子年八十一卒顏貌如生人以爲尸解有  
文集三十卷洞天福地記錄異記廣成義東瀛子  
青城山記武夷山記壩城集仙錄諸書凡數十種  
又撰西湖古蹟事實二卷見續文獻通考及陳氏  
世善堂書目

臣甫麻鞋入蜀行晚辭紫閣隱青城洞天福地縉新錄碧

水丹山理舊盟孤嘯嶺猿磨墨去梳翎澗鶴報書成才人  
竟作神仙老惆悵當年下第名

西泠仙詠卷一